

I

QUÆSTIO MEDICA,
QUODLIBETARIIS DISPUTATIONIBUS
MANE DISCUTIENDA
IN SCHOLIS MEDICORUM,

Die Jovis vigesimâ quintâ Junii 1711.

M. PETRO LE TONNELIER, Doctore
Medico, Præside.

An sequi Naturam ducem, saluberrimum?

I.

NATURA, vox ambigua & multiplex ab omnibus sæpiùs usurpata, à paucis comprehensa. Hanc Philosophi deducunt in communem & propriam; prima, vis est quædam admirabilis, quæ omnia pervadit, administrat omnia, ut communis mater, causa, principium, divina ratio toti mundo partibusque ejus inserta: divina, si velis, nuncupaveris artem, cujus solertiam ars nulla, nulla manus, nemo opifex consequi possit imitando. Huic illud proprium est, ut in ipsâ simul inveniatur materia ex quâ quæque res efficiatur, & vis illa quæ quidque efficiat. Hanc cum infinita sit sapientiæ, providentiæque, sic sapientissimam esse par est, immò divinam providentiam, sapientiamque, Deum ipsum opificem rectoremque universi. Quod si quid aliud à Deo sit Natura illa universalis, Dei quasi Vicarius habeatur, qui, ut cuncta gignantur, principia subministrat, unde à gignendo *quæ*, ut, à nascendo, Natura: Ab universali singularis emanat, ut à fonte rivus, à trunco ramus, à matre soboles. Hæc originis suæ retinens solertiam sapientiamque, singulis rebus propria est, mineralibus, metallis, stirpibus, animalibus, verbo dicam, unicuique in quo est principium & causa motus, ac quietis. Difficile dictu, an ignis sit artificiosus, actuosus, æthereus, unde prodeunt, continuantur, absolvuntur motus omnes ad vitam necessarij, æquabiles, constantes, generationis, incrementi, perfectionis;

A

an verò temperies quædam, & energia, ex solidorum dispositione, fluidorum indole, mutuâque inter se proportionē; an motus certa quantitas, certa determinatio, partiumque figura censerī debeat; an hæc omnia simul. Quidquid sit, illam esse demonstrare qui tentat, ridiculum tentat. Singula quæque ita constituit, ut per eam à cæteris maximè differant. Privata rei cujusque Natura, cum divinam originem agnoscat, sapientissima est, vel potius à publicâ semper & ubique agente, privata semper & ubique dirigitur & adjuvatur. Utraque igitur una & multiplex, propria & communis, simplex & multiformis, Protæum rectè dixeris. Ne hominem utrâque defectum existimes, aut alterutrâ. In eo tamquam in sacrario ambæ conjunguntur amico fœdere, societate operum ita devinctæ, ut non ampliùs geminæ. Hæc igitur Natura, cum sapientissima sit, sapientissimè hominem condidit, omnesque ejus actiones ita dirigit, ut istâ duce nemo possit aberrare. Ex eodem luto majores nostros genuit, nos deinde, atque alios; illâ vehimur omnes.

I I.

QUISQUIS mortalium vis scire Naturam, ubi, & quid agat? observa earum omnium, quas suo complexu mundus coercet, rerum minimas, maximas, quallibet; ubique se ostendet suis signis. Studes compendio? te unum inspicere, nosce teipsum, sed intus & in cute; satis superque erit ut possis nosse opus Naturæ esse opus Intelligentiæ sapientissimæ. In homine, ut parte totius universi pulchriore, perfectiore, diviniore, omnes illa suas contulit divitias, seipsam veluti exhaustit. Ita Naturam homo nactus benigniorem matrem, ut omnium animantium formam vincit, sic tenet principatum: id huic illa dedit ampliùs, quod rationem addidit, quâ, si non Deo æqualis, saltem ejus imago videatur. Quæ fuit Naturæ cura, studium, sollicitudo ergà hominem? Is omnia sua illi debet, cum sanus est; quàm plurima debiturus, si æger convalescat. Illinc à primo ortu eas habet res quas Medici naturales vocant: his constat & durat; quas quidquid immutat, depravat, evertit, contrà naturam esse censendum est. Ibi hæc reluctans obsistit pro viribus, nunquam detrectatura certamen, opus suum ne quid capiat detrimenti. Quæ verò res inter naturales, & eas, quæ contrà naturam dicuntur, mediæ sunt, Naturâ ipsâ bonæ, abusu tantùm malæ. Quàm artificiosa eadem Natura sit, ad hominis conformationem attende. Hujus tota fabricatio perfecta est, solers subtilisque descriptio partium, eximia constructio membrorum; subjectorum ossium mirabiles commissuræ, ad stabilitatem aptæ, ad finiendos artus accommodatæ, ad motum, ad omnem corporis actionem, nervorum toto corpore

pertinentium mirabilis complicatio; venarum arteriarumque singularis unitas; undè tractæ, eodem profectæ; earumdem innumerabilis multitudo; ubi desinere videntur, extremis etiam partibus intextæ, ac tandem in se ipsas incurvatæ. Solidorum & fluidorum mira motûs reciprocatio, mirum æquilibrium, omnium denique è quibus constamus temperatio tam concinna, tam elegans ordo, ut nihil ad usum melius, ad speciem pulchrius esse possit; aut si quid hac lege alienum videatur, nunquam præter naturam, sed præter naturæ consuetudinem. Eruditam esse Naturam dubitas? Infantes pueros considera, quàm blando laborum linguæque motu lac sugant è mammis, faciliè divinabis hos illud edoctos esse ab optimâ magistrâ. Perge ad alteram ætatem, mirare pubertatis stupendas & subitas mutationes. An eadem Natura justissima meritò censenda est, cum incrementi modum in animalibus statuit & certos fines, quos ultrâ, citràque nequit consistere rectum? Nonne, hæc ut servet, illius sapientia est providentiaque sagacissima, cum cibi cupiditatem & potûs ingeneravit, ut coctione eorum, atque commutatione, distributioneque factâ, quod effluit resarciretur; ob id etiam somni vigiliæque necessarias vices concessit; ejusdem industriæ cibi reliquæ depelluntur per imam excrementorum viam, cum astringentibus se intestinis, tum relaxantibus: potus verò, humoribus iis qui ex renibus & vesicâ profunduntur, ejectis aliis sordibus per insensiles cutis meatus extrâ corporis pomœria. Quis Naturæ divinitatem quamdam & vim admirabilem denegare poterit in functionibus animæ edendis, perficiendis? Hinc animi celeres motus, ad excogitandum acuti, ad explicandum, ornandumque uberes, ad memoriam firmi, diuturni, ad omnem denique virtutem naturalem, etiam moralem accommodati; ideò Natura tam blanda conciliatrix, & sui quasi lena, cujus tanta vis est, ut nemo homo velit nisi homini similis esse. Sic consultrix & provida Natura utilitatum, opportunitatumque omnium quibus servari sanus quàm diutissimè possit, & æger quàm citissimè restitui sanitati. Hinc prodigiosa illius calliditas, potentia (dolum dicas an virtutem) ut à morbis redimat. An ideò primus illa audit jure morborum medicus, cum tutò, celeriter, jucundè curet? nihil temerè agens, nihil supervacaneum, nihil nimium, nusquam cessans, ubique sufficiens, nec deficiens uspiam; quæ, nisi vias invenit, facit, quibus, vel aperto Marte, vel insidiis certis, statisque periodis dierum, hebdomadum, mensium, annorum, insensum hostem à vitæ laribus longè propellit, operatâ prius coctione, separatione, quàm evacuationem machinetur. Sapientis Naturæ isthæc sunt opera, ut vitam sensumque totius & partis foveat, tueatur, sustentet.

TANTI esse vitam quis putat sedulo, ut tot constare beneficiis Naturæ existimet, tot indigere credat ad sui conservacionem? Illa, Naturæ depositum pretiosissimum, quod uti nobis initium omnium rerum, bonorum, cum ortu nostro affert; sic exitum, mors. Illam qui servare potest quàm diutissimè sanam, hanc retardare; sapiens sit necesse est: vitæ idè dux quàm optimus, qui ei semper præsideat, eam regat, qui ne momento quidem abesse possit aut debeat; id facit tamdiù, quamdiù societatem corporis aut animæ retinet. Hæc stat donec convenientia est corporis cum animâ, finitur eadem interitu; qui discessus est diremptusque earum partium; quæ ante interitum junctione aliquâ tenebantur. Vitæ spatium variis ætatibus distinguitur ad quadripartita anni tempora accommodatis. Illarum etsi diversarum unus est cursus, via una Naturæ, eaque simplex: sua tamen cuique tempestivitas data, unde ut magis infirmitas puerorum, ferocitas juvenum, gravitas constantis ætatis, sic senectutis maturitas, naturale quiddam habet, quod suo tempore percipi debeat. Hæc ut plus Naturæ debet quàm ulla quævis ætas, sic & sua aliarumque omnia reddit: hanc itaque mors excipit, sed naturalis; mori siquidem natura est, cum expletur vita satietate vivendi, desinitque sine dolore, molestiâ. Aliter judicandum de eâ quæ ut funus infert acerbum, sic violenta ferè & contra naturam est, quæ ut vitæ contraria, sic altera ejusdem terminus est & ultima rerum lineâ. Ut altera fugienda fugandaque omni industriâ sic altera placidè expectanda, nec metuenda, nec optanda. Ut alterâ præciditur conjunctio utriusque naturæ corporis & animi; sic alterâ dissuitur sensim. Hoc modo bis-puero clauditur, cui semel puero eadem ferè ratione contigit; tam similis est ratio ortûs & exitûs: cum utrimque nullarum ferè rerum nec doloris sensus. Pueri tum vita incipit intra uterum, cum primo conceptionis instanti actuosæ seminis partes (spiritum genitorem dicas si velis) prima embryonis rudimenta aggrediuntur, & in durâ meninge elasticum motum excitant. Annexæ hæc membrana basi solidæ cranii impressum sibi motum servat & elateris ad instar, nunc se contrahens, nunc verò relaxata ordinatos systoles atque diastoles motus edit. Oscillans itaque alternis ictibus, blandè cerebrum premit, spiritus animales inibi inclusos exprimit, primò in medullam oblongatam, deinde in spinalem, tum in nervos, denique in universam fibrarum compagem. A fibris itaque duræ meningis, quibus & cor & musculi moventur, quasi ad nutum oscillantibus, liquida corporis huc illuc circumferuntur; ab antiquâ nobilitate, partiumque primatu merito nunc ex-

297

3

cidit cor, cui principatum in microcosmo error olim tribuerat hominum, non Natura. Nobilitatis indicium in durâ meninge, subditarum partium, vel etiam cordis obsequentia, quæ omnes, si lædatur, læduntur & ipsæ; non autem vice versâ. Vita sic à solidis inchoata, fluidis fovetur. Sed quid sit vita quæris? attende ad solidas & fluidas partes, ex quibus humanum corpus constat. Solidas vidè assidue oscillantes, motum inter se æquabiliter reciprocum, humorum commolitionem, eorumque cursum indefinenter promoventes; fluidas considera perenni circuitu motas, jugi triturâ attenuatas; pendente ut extremas corporis fibras subeunt, canales vel tenuissimos alleunt, per glandularum colatoria secernuntur, per emunctoria quæcunque vel cutis poros excernuntur. Nonne vitam dicas reciprocum solidorum & fluidorum motum? Quibus tamen vita constituitur, iisdem servari non potest sine externis quibusdam adiumentis, cibo, potione, spiritu; horum communis ingressus, os, hujus etiam, nares, unde per asperam arteriam ad pulmones via est. Statim atque infans extrâ uterum spiritum trahit, tunc propriâ vitâ vivere dicitur, qui prius alienâ, seu matris vitâ vivere videbatur. In pulmones enim recens nati illapsus aër sanguinem in pulmonibus tantummodo maternis perfectum, tunc in ejus proprio sinu attenuat, expandit ac perficit. Cibus & potio per gulam demittuntur in ventriculum; ubi sufficienti morâ, ventriculi fermento & motu subacti, in succum cremori similem mutantur, tenuia deinde subeunt intestina, lactea vasa permeant, unde ad cor & pulmones transmittuntur, jam jam in sanguinem convertendi, spirituum, & cæterorum succorum originem & promptuarium. Ab his exord'is vita pendet, his filis ducitur; quæ si rumpi contingat, hinc subitæ mortes atque intestata senectus. Non aliunde igitur consensio omnium conspiratioque petenda quàm ab æquabili fibrarum oscillatione, assiduo succorum circuitu; quibus vita servatur, motus & sensus vigent, omnes actiones peraguntur. Quæ cùm infinitæ sapientiæ & scientiæ sint opera, non nisi ab eâdem sapientiâ conservari possunt.

I V.

SUMMA humanæ vitæ felicitas, quæ sanitas est, ut absolutâ functionum animæ & corporis integritate dignoscitur, sic & definitur. Illud enim fuit Naturæ institutum, ut mens & corpus, tametsi res longè dissimiles, strictè tamen consociarentur, atque inter se vincirentur eâ lege, ut mens operationes suas, nisi mediante corpore ut instrumento, exercere non posset, immò non ageret nisi quantum à corpore ad actionem determinaretur, ut quodcumque afficeret corpus, prout ad ejus conservationem vel detrimentum tenderet;

illud idem pariter mentem voluptatis vel doloris sensu afficeret. Prout igitur corpus benè vel malè affectum est, sic mens benè vel malè afficitur. Hinc ingeniorum miræ varietates atque morum; hinc rarò occurrit mens sana nisi in corpore sano. Voluptas igitur & dolor à naturâ instituta sunt, ut homo his sensationibus ad ea quæ ejus vitam non modò foveant, sed sanam & jucundam efficiunt, impellatur; ab iis verò quæ vitam adimere possunt, vel bonam valetudinem lædere, amoveatur. Hoc sapientissimo Naturæ instituto, non nisi ratione depravatâ abutimur. Ut corpus vivens est, dum perseverat motus solidarum partium & fluidarum reciprocus; sic sanum dicitur, cum, ex parte solidarum, æquabilis est fibrarum oscillatio; ex parte fluidorum, summa fluxilitas, nec interrupta secretio. Sanitas autem sex rerum quas Hygiene complectitur usu moderato, & ad Naturæ nutum dispensato conservatur. Aër exquisitè temperatus, nec tenuior nec crassior, sanguinis consistentiam tenuiorem efficit, circularem ejus motum promovet, eumque aptiorem reddit ad spiritus animales suppeditandos. Cibus potusve moderatus & unicuique congruens, jacturam solidarum liquidarumque partium affinitibus particulis, dispari tamen ratione restituit. Lenis & blanda corporis exercitatio spiritus torpentes exfuscitat, tardiores sanguinis motum adauget, humorum ad secretionem, insensilem perspirationem mirè confert. Tranquilla corporis & animi quies utriusque vires recreat; spiritus celeriter effluentes plenius per somnum in suis ergastulis coacervati ad officia alacrius redeunt: exhaustum diuturnis excubiis corporis robur somno reficitur, & perennis substantiæ nostræ deperditio utcumque cohibetur. Quæ debent excerni non impunè retinentur, nec excernuntur retinenda. His in rebus Naturæ monitis diligenter ausculta, jubenti parere ne recuses, nec eam silentem irrites: Natura enim non deficit in necessariis, non abundat in superfluis. Animi pathemata non minùs sapienter à Naturâ hominibus ad eorum salutem concessa fuere, omnibus quippe rebus dedit fecunda virtutum semina; sic ira ad fortiter resistendum periculis, timor ad ea fugienda, mœror & lacrymæ ad cæterorum commiserationem excitandam, opem extorquendam, gaudium ad bonum corporis statum percipiendum & conservandum, amor ad hominum speciem propagandam. Hæc omnia homini non infensa, imò maximè salutaria. Si quis, dissimulatis tot bonis, queritur quod quædam homini noxia, perindè facit, ac qui Nilum frugiferum calomniatur, quòd Crocodilum nutriat; nec postea velit frui prognatis frugibus, sed tantùm queratur de venenis. Quomodocumque lædatur sanitas, ad eam restituendam homo Naturâ semper indiget, sæpè &

299

7

arte. Ars Naturam imitatur operando; citrà Naturæ concurrentis auxilium frustranea est Medici cura, & inutilis labor. Leges Naturæ fundamenta Medicinæ: hæc illius interpret & ministra. Medicus in Naturæ contemplatione exercitissimus sit, non solum earum rerum quæ vel prodesse possunt, vel obesse, indolem & temperiem perfectè cognoscat; sed etiam ad uniuscujusque ægrotantis Naturam respiciat, cum varia sit, vel sui per se, vel ætatis, vel sexûs; nempe trahit sua quemque voluptas, quisque suos patitur Manes. Huic ille cibus sanitatem custodit, qui in alio crearet morbum; an ideò deterior paulò, sed suavior, melioribus, si minùs gratis, alimentis est præferendus. Similiter non omnibus annis omnia conveniunt, ut beata laudabilisque sit cujusque vita. Sic quæ hominem sapientissimè condidit Natura, eundem sapientissimè conservat, & summâ cum prudentiâ ac sapientiâ saluberrimum efficit.

V.

ANIMAL quodcumque, statim atque natum est, hanc à Naturâ appetitionem, declinationemque accipit, & sensum rerum, aut utilium, aut noxiarum, quibus duci se patiuntur cæteræ animantes. An idcirco rariùs ægrotent quàm homines, & leviùs? An iisdem commodis fruebantur recentes ab ortu mundi mortales, atque ut diutiùs viverent, quia nondum Natura arti cesserat, nec frugalitas luxuriæ, nec necessitas voluptati. Tunc vivebatur parvo benè, dum ex Naturæ legibus vivebatur. Hæc, licet opulenta, semper, & ubique significat, quàm paucis, quàm parvis rebus egeat, quàm vilibus. In quantum sitis, atque fames, & frigora poscunt; ad hæc nemo pauper est. Divitiarum illa quibus contenta est, homini sæpè satis non est, qui solus animantium terrâ pascitur & mari, ut merito *πρωτόζωος* audiat. Hominis illud, non Naturæ, vitium est, proclivis negligere, simplicem cibum, & optimum non admittere, panem, & aquam respuere, quæ ad vitam servandam sufficiant: contrà prosequi saporum acervationem pestiferam, pernitiola condimenta, cœnas dubias; quæ omnia, & mortem accelerant, & magnas morborum cohortes invehunt. Hæc sunt artis operosæ mala, simplicem Naturam nunquam imitantis; quæ quidem Naturam omnibus cum obvia sit, pluribus tamen est invis, soli pervia sapienti. Is rebus sublunaribus commodè utitur ad salutem, qui ubique agnoscit Naturam, ubique sequitur; undè, quæ illi omnia facilia & expedita, cæteris ardua, perindè ac adverso nantibus flumine, & contranitentibus. Innumera hominem infestant mala à Naturæ semitis aberrantem; error in novos errores præcipitat, ex quibus emergi non potest, nisi unâ duce Naturâ. Tenenda igitur via cum sapiente,

quam illa præscribit, nec ab eâ declinandum. Hâc siquidem ducere errari nullo modo potest; quæ ita semper adjunctam habet voluptatem, ut nihil quidpiam velit, quod rationi repugnet, immò illa sapiùs ad virtutem inclinât ac dirigit; Natura enim prima pietatis est magistra. Homo pius, justus, sapiens esse potest, sibi aliisque benignus: nempe id habet à Naturâ, ut ex hoc aspectabili mundo, & eorum quæ quotidie in eo oriuntur & occidunt, varietate, pulchritudine, ordine, Deum ipsum possit agnoscere, hujus universitatis authorem; ut se diligit, conservet, omnia in corpore & animo perfecta esse velit, omnibus expleta virtutibus, ut se natum arbitretur ad alios juvandos, tutandos, conservandos, quia ipsi sunt similes, & ejusdem universi partes. Illi igitur plûs fidas quæ sapientissima est, cui debes vitæ, sanitatis, virtutum semina, & fundamenta: sic saluberrimè vives, sic dominaberis astris.

Ergò sequi Naturam ducem, saluberrimum.

Domini Doctores disputaturi.

M. Ludovicus-Franciscus du
Tal, Pharmacia. Professor.

M. Claudius Berger Medicus
Regis ordinarius à Regia
Scient. Acad. & in horto
Regio Chymia Professor.

M. Antonius le Moine.

M. Michael Ludovicus Re-
neume de la Garanne
Professor, & Regia Scien-
tiarum Academia socius.

M. Philippus Bernardus de
Bordegaraye rei Herbaria
Professor.

M. Guydo Crescent. FAGON
Regi à sanctioribus consiliis
Archiatrum Comes & Regia
Scient. Academia honorarius.

M. Raymundus Jacob Finot.

M. Jacob. Simon Gilles de la
Riviere.

M. Jacobus de Bourges.

Proponebat Lutetiæ JOANNES BAPTISTA LE BRETHON,
Peronnæus, Baccalaureus Medicus. A. R. S. H. M. DCCXI.

PARISIIS,

Typis Viduæ Francisci Muguet, Regis & Facultatis Medicinæ
Typographi. 1711.